

Ferovier ecologista e sparagnin

Da veneśian de Castelò co' 'l-že vegnio a star in campagna el só sogno el-že sempre stà 'l orto dadrio de casa. El-gaveva 2500 metri quadri – prima tuto 'l orto el-gera un grośo impegno andarghe-drio anca parché el grośo del lavoro el-gera de ła só signora e ju par el lavoro el-gavaria vù un fia' de riguardo e vedendo che ła roba maturada ła-gera sempre tanta, in pratica el-riforniva el vicinato de verdura a gratis. E a son de dai e dai el-ga ridoto 'l orto e el-ga piantà kiwi che i-fa-ben, no so quante piante, na saresera, do figheri, uno bianco e uno nero, nespoli, un pomer, do saresere che ła-moriva sempre...insoma 'l- li ga piantai fiśi fiśi sti albari ché ju el-credeva che i-restaśe sempre picoli, ma co 'l paśar del tempo že diventà na foresta. Un bel giorno, par far ciaro, el-ga tagià squasi tuti i albari e el-ga fato legna da brusar, anca parché in caverneta el-gaveva ła cucina economica e de inverno ła-gera sempre impiśada ché ła-scaldava el dabaśo.

Però resta sempre un toco de orto: queło che bastava par lori. E par concimar 'l orto, ju no 'l-doparava concimi ma da ecologista ch'el-gera, el- se ricordava che quando el-stava a Castelò no i-gaveva el ceśo e i-faseva tuto in bocal e dopo i- lo svodava in canal. Parché allora, el-pensa, no far anca qua neła mastela e butar tuto dopo sora ła culiere par coltar ła tera? Ła salata, i pomidori, i pevaroni, 'l ajo, ła segołe, i cavoli, i radici...tuto vegneva-su più rigolioso. I viśini però, quando che i- se ga inacorto de come che ju el-concimava ła verdura no i-ga più vołesto gnente de 'l orto. Un particular: ju el-magnava a scroco par i supermercati, sercando nose, bagigi, sariese, ua...e tuto queło che se-pol sercar.

Ju, da bon veneśian de Castelò, nato e creśuo in fundamenta, el-ga sempre credesto che i bagigi i-creśeśe su i albari, fin che, (tornando al concime: merda e piśo slongà co l'aqua), magnando bagigi, qualchedun no el-vegneva digeri e el-restava intiero, e fasendo neła mastela e ndando po in tera, el-naśeva. Eco ch'el-gaveva scoperto che i bagigi i-creśe sototera – no se -finiśe mai de imparar! Però ju, tołendo tante mediśine e recuperando quel ch'el-faseva, a só volta ła verdure ła-produseva i medicinafi che ju gavaria dovù tor...comprese quełe de ła muger.

In sto modo no ocoreva comprar tante mediśine ma co el só sparagnar, dopo in ultima, costava el dopio.

El ferrovier ecoeogista